



EDITORIAL

Gerra han katawhan, baton ha terorismo han estado

Diri na makaghadi ha daan nga pamaagi hi Duterte. Nagpahayag hiya hini nga naglabay nga "mapipiritan" kuno hiya nga gamiton an militar agud kuno seguruhon nga magigin "murayaw ngan mamingaw" an eleksyon 2022. Diri na hiya nasasadangan ha grabe nga pan-gigipit ngan waray kapareho nga panalapas ha tawhanon nga katungod ha ilarum han iya rehimen. Yana, ha desperasyon nga magpabilin ha poder, tubtub an kondukta ngan resulta han eleksyon karuyag niya manipulahon komo dugang nga pag-seguro nga mapabor ini ha iya.

Waray hunong an iya mga pa-ningkamot nga gamiton an bug-os nga makinarya han estado agud brasuhon, hadlukon, ngan pasundon an ngatanan subay ha iya larang. Subay ha "bug-os-nga-nasud nga daup," ginpipirit han iya pasista nga rehimen an bug-os nga katilingban nga pumartisipar ha iya madugo, mada-rahug, ngan diri makatawo nga todo-gerra kontra ha rebolusyunaryo nga kagiusan. Target hini an ngatanan, tikang ha mga ordinaryo nga parag-uma ngan mga mabinuligon nga orga-

nisasyon, tubtub ha mga pulitiko ngan negosyante. Nagpapauran ini hin mga bomba ngan ginhihimo nga kampo militar an mga baryo. Hin-o man nga diri sumunod o umabuyon, usa nga "terorista" nga angay la pakarauton, kasuhan, arestuhon o patayon.

Pangilal-an an natikagrabе nga todo-gerra ngan terorista nga pan-muyopoy han usa nga desperado, nahihimulag, ngan naghuhuramentado nga halimaw nga naatake ha ngatanan nga direksyon. Kundi pakyas ini

Responsable ha pagpatay han lider masa, ginsirutan han BHB-MAC

GINSIRUTAN HAN BAGONG Hukbong Bayan-Mt. Amandewin Command (BHB-MAC) hi Jojo "Pekulo" Lucero, usa ha mga responsable ha pagpatay kan Carlito Badion, lider masa han grupo han mga kabras ha syudad nga Kadamay, hadin Hunyo 25 ha Ormoc City, Leyte.

Ginpagawas han pulisya nga simple nga kaso han pagpatay ngan pan-ngawat an insidente. Kahuman patayon hi Badion, sumurender hi Lucero ha kapulisan kundi waray kaso nga ginsalawad ha iya, ngan ginpauli pa nga mayda dara nga *groceries* ngan pahalipay. Buwa pa nga ginbasol han militar ha BHB an panmatay. Ginpatay ni Lucero hi Badion hadton Mayo 2020.

Sigon ha report han BHB-MAC, daan na nga lanong nga parupan-ngawat hi Lucero. Damo na an nagpa-*blotter* kontra ha iya kundi diri hiya gindadakop han kapulisan. Gintatarhug pa niya an iya mga biktima. Han patayon niya hi Badion, nagkawat liwat hi Lucero hin unom nga manok, lima kasako hin mais, ngan mga higamit pan-uma nga aada ha balay nga gin-uukyan hadto han iya biktima. Ginkawat liwat niya an *laptop*, *cellphone* ngan kwarta ni Badion. ■

Halad nga kanta para ha Dolores 20

ha tono han "Kun Harapit Na An Adlaw Matunod"

Kun harapit na an adlaw matunod
Amon panumdom ngadto ha iyo
Nagtikang an kakulba ha dugan
Amon kahidlaw ha iyo dako

Pagtikang han panuro han tun-og
Mga bukad ngan dahon nanhumog
Amon luha daw burabod
Pagpasarinsing an pagtubod

Kun nadangat na an gab-i
Nagtikang an kamingaw
Labi kun nabati
Han huni han kalaw

Pagpurak han sidlangan
Pagpunias han adlaw
Pagkalpad han maya
Gindumdom kamo tanan

Ginhingyap kam han inagi nga adlaw
An himaya nga hingpit gayud
Labi na kun upod kam pagtan-aw
Han pagsulong han mga balud

Kun ginhihigabut an amon kakulba
An kamingaw namara-para
May nam tingali amon paglaum
Urupod-upod la kit gihapon

Salit an pagsalidsid
Han mapawa nga adlaw
Higtaas nga bukid
Luob hin kasilaw

Paghuni han gangis
Upod an kamingaw
Duyog an paglaban
Gindumdom kamo tanan.

*(Iginpapasaro ini nga adaptasyon
nga nahimo komo paghandum ha
20 nga kasama — diri 19 sugad han
nahiuna nga ginreport — nga
mabayanihon nga naghalad han ira
kinabuhi ha Dolores,
Eastern Samar hadton
Agosto 16.)*



"Gerra han katawhan..." tikang ha paypay 1

nga puypuyon an kangalas han masa
ngan dugang ini nga nagpapalarab han
naticadako nga pag-ato han katawhan
tungod ha diri maihap nga krimen hini.
Dugang nga nakikit-an han katawhan
an panginahanglan nga pagbaydon hi
Duterte ha iya terorismo ngan tapu-
son na an iya tiraniya.

Kinahanglan dugang pa nga pahit-
tas-on han katawhan an ira militansya
ngan pumartisipar ha gerra han ka-
tawhan kontra ha todo-gerra han re-
himen Duterte. Kinahanglan padayon
nga tukuron ngan konsolidahon an
mga rebolusyunaryo nga organisasyon
masa agud pangandaman, atubangon
ngan pakyason an pasista nga todo-
atake han rehimen. Waray kakapoy
nga maglansar hin propaganda-ahi-
tasyon ha pinakahiluag nga masa agud
pahitas-on an ira diwa nga mapan-ato
ngan kaandaman nga pumartisipar ha
gerra han katawhan. Kinahanglan nira
atuhan an ngatanan nga larang ni
Duterte nga magpadayon an ira pag-
hahadi lahos ha 2022.

Kinahanglan dirudiretso nga ibuk-
sas an pangabuso han mga pasista
nga tropa. Irekord an kada panalapas
ha tawhanon nga katungod ngan ga-
miton an masmidya ngan *social media*
agud ibuksas ini. Ha kabaryuhan, ma-
hugot nga makigbuligay ha hukbo han
katawhan. Diri angay pasagdan an
mga pasista nga tropa nga nanriribok
ha mga komunidad. Palibutan hira hin
protesta ngan dirudilain nga porma
hin pag-ato ngan palayason hira.

Kinahanglan papintason han Ba-
gong Hukbong Bayan an mga taktikal
nga opensiba kontra ha mga pasista
nga tropa han rehimen. Pagbaydon hin
mahal an mga mayda grabe nga utang
nga dugo ha katawhan. Ringalon hin
susrunod nga atake an mga pasista
nga nagsasabrag hin terorista nga
ngirhat ha mga baryo. Mag-andam
para ha matikagrabe pa nga panga-
take han kaaway pinaagi han mas
mahugot nga pagkatin han disiplina
ngan paglikay ha mga depensiba nga
agway. ■